

THE HISTORY OF THE CITY OF LONDON

BY
JOHN STOW

欽定剿平捻匪方略卷一百八十三 癸亥年

三月十八日甲子掌山東道監察御史王蘭谷奏

言查降衆宋憬詩雷鳳鳴皆係張錫珠等舊黨
自陝西擅回東省經文煜譚廷襄責令勦賊自
效在當日不過羈縻之術耳詎該降衆等藉募
勇爲名招集舊黨以自固宋憬詩聚至三千餘
人雷鳳鳴聚至一千四百餘人不惟不肯勦賊

而且潛與賊通時常接濟賊匪火藥鉛丸等物
該處柳林團勦賊最爲得力宋憬詩卽誣以通
賊殺其團長文生王百齡並斃團丁多名該團
乏食宋憬詩斷其糧道意在盡殲其類並在東
昌等處布散耳目犯門斬關肆無忌憚復於所
住之甘管屯修築土圩賊首楊殿一現在該圩
藏匿東省楚勇稍能打仗雷鳳鳴以語言微露

乘其不備襲殺數百名槍礮器械盡行搶去營
總海羣禁其打糧雷鳳鳴殺其馬隊多名遂踞
沙鎮土圩收納馬賊增益馬隊至五六百騎兩
奸叵測竟與賊爲犄角之勢官軍受其牽掣民
團畏其傾害雖欲勦賊而勢有不能賊遂恃爲
護身符逋逃藪出沒自如毫無所忌此欲清東
境必先除宋憬詩雷鳳鳴也而議者或謂直東

之賊爲數已多若致宋憬詩等速變勢更難剿
不得不暫爲羈縻竊謂變速禍猶小變遲禍更
大若其黨與愈聚愈衆一旦竊發其能制乎且
此輩以力去之則難以計去之則易首惡旣除
餘匪自散何慮致變竊計山東現無精兵又無
良將未可輕舉僧格林沁自剿平豫捻後羣賊
聞風落膽可否請

旨密飭僧格林沁統兵來東誘宋憬詩雷鳳鳴到營
聲其罪而誅之一面撫所部勇馴良者妥爲安
插桀驁者盡行搜捕然後直擣賊巢與直兵夾
擊旬日之間定可蕩平惟宋憬詩等耳目衆多
幾事不密則害成並請

飭下僧格林沁不露聲色密爲設法籌辦出其不意
以殲厥渠知破竹之勢定能所向如志也奏入

上命議政王軍機大臣傳諭僧格林沁曰宋憬詩等
狼子野心本非善類現復由陝西擅回東省招集
黨與通賊殺國並戕害兵勇多名致官軍民團均
受牽掣不能專力勦賊若復再事羈縻恐該降眾
聚集益多乘隙舉事愈難勦洗僧格林沁現由毫
州移師北上計可行抵東省著卽相度機宜將宋
憬詩雷鳳鳴設計調至大營訊明正法一面將所

部降衆分別解散其桀驁者盡行搜捕以清後患
惟宋憬詩等耳目衆多恐其風聞遠颺僧格林沁
務當不露聲色慎密將事斷不可稍有洩漏致誤
事機

十九日乙丑嚴樹森奏言皖豫捻逆陳大禧蕭汝

信程二老砍等率黨由豫之光山擾及麻城縣
境之白杲嶺等處經臣會同官文調派馬步水

陸官軍會合勦辦三月初一日提督成大吉一
軍與副都統花凌阿移紮離白杲十餘里之趙
家團地方偪賊而壘總兵穆正春等馬步各軍
亦均扼紮沙河約期夾擊該逆於白杲嶺修築
土牆肆出焚掠初二日穆正春等各率馬步馳
抵距白杲十里之望花地方斃賊十餘人初三
日又於望花地方殲斃悍賊五百餘名賊勢不

支紛紛亂竄適成大吉花凌阿排隊進偏該逆
兩面受敵踉蹌東遁我軍乘勝追殺越五十里
直至東界嶺始行收隊初四日賊由東界嶺竄
至卷庭岡復經羅田團勇擊敗該逆偵知上巴
河防兵遠出營壘空虛遂折向南趨意欲直撲
上巴河占踞我軍舊壘以圖襲取黃郡西犯黃
陂初五日由大崎山李漢墩三里畈五桂河竄

至但店等處南距上巴河僅三丁里穆正春偵探確實商令王桐柏扼賊回竄白杲之路一面親率所部會合烏勒喜布馬隊疾趨上巴河突前衝擊立斬執旗賊目二名該逆大駭狂奔落河淹斃無數其隔岸大股賊黨退竄竹瓦店後隊仍在但店一帶臣現已飛飭穆正春相機進兵重檄調王桐柏折回會剿又咨催護軍統領

舒保迅率馬隊馳紮黃岡之李家集西可顧武漢門戶東可策應諸軍一面函囑成大吉楊朝林各率馬步繞出賊前痛加遏剿以收夾擊之效臣因賊勢東趨武漢人心大定卽於初六日隨帶親兵五百五十人馬兵五十騎並水師礮船由省起程初七日馳抵黃州府屬之團風鎮扼紮就近調度該處距上巴河及黃州府均各

五十二里既可壯後路聲援而前敵諸將亦各有
所稟承於防勦事宜不無裨益奏入

上命議政王軍機大臣傳諭官文嚴樹森張之萬毛
承熙唐訓方曰皖豫捻逆陳大禧等由豫省竄擾
光山擾及麻城之白果嶺等處經官文等調派總
兵穆正春等進勦殲斃悍賊五百餘名該匪折回
東南意圖襲取上巴河營壘經穆正春先期馳抵

該處將撲營之賊擊退該逆現踞竹瓦店但店等處嚴樹森現已帶兵出省馳抵黃州之團風鎮扼紮就近調度著官文嚴樹森卽飭舒保成大吉等痛加遏剿以收夾擊之效現在賊勢逼近黃州雖距武漢較遠而與皖省潛山太湖一帶壤地相連深慮該逆蓄意東趨與巢含和一帶髮逆互相勾結嚴樹森務當督飭諸軍繞出賊前迎頭截剿毋

得任賊竄入皖境致滋蔓延並著唐訓方選派兵
勇激勵鄉團於交界地方嚴密堵遏毋令賊蹤闌
入皖境前因此股捻匪竄入鄂疆諭張之萬毛昶
熙飭令余際昌一軍會同楚師合力攻剿現在余
際昌曾否追入楚境張之萬等務宜不分畛域飭
余際昌越境會剿盡殲醜類毋許觀望遲延致滋
貽誤

同日議政王軍機大臣大學士刑部會奏言前
因已革兵部侍郎勝保呈遞親供與原案各件
情節不符奏明再行駁詰訊問臣等復於前訊
各條內摘錄情節駁詰五條督飭章京司員會
同監提勝保令其逐條登覆據勝保供稱蒙訊
陳玉城之妻何以跳河身死一節查犯婦朱氏
因委員訊非賊首妻室是以提赴穎郡覆審押